



Arolygiaeth Gofal
Cymru
Care Inspectorate
Wales

Adroddiad Arolygu

Clwb Plant Dyffryn Nantlle

**Safle'r Caban, Ysgol Bro Lleu
Ffordd Y Brenin
Penygroes
Caernarfon
LL54 6RL**

This report is also available in English

Mae'r adroddiad hwn hefyd ar gael yn Saesneg



Dyddiad Cwblhau'r Arolygiad

02/10/2024

Llywodraeth Cymru © Hawlfraint y Goron 2024.

Cewch ddefnyddio ac aildefnyddio'r wybodaeth sydd yn y cyhoeddiad hwn (ac eithrio'r logos) yn ddi-dâl, mewn unrhyw fformat neu gyfrwng, o dan delerau'r Drwydded Llywodraeth Agored. Gallwch weld y Drwydded Llywodraeth Agored ar wefan yr Archifau Gwladol, neu gallwch ysgrifennu at The Information Policy Team, The National Archives, Kew, London, TW9 4DU, neu anfon e-bost i: psi@nationalarchives.gov.uk

Rhaid i chi atgynhychu ein deunydd yn fanwl gywir a pheidio â'i ddefnyddio mewn cyd-destun camarweiniol.

Clwb Plant Dyffryn Nantlle

Y math o ofal a ddarperir	Gofal Dydd Plant Gofal y Tu Allan i'r Ysgol
Darparwr Cofrestredig	Clwb Plant Dyffryn Nantlle
Lleoedd cofrestredig	40
Iaith y gwasanaeth	Cymraeg
Arolygiad blaenorol Arolygiaeth Gofal Cymru	15 Mehefin 2018
A yw hwn yn wasanaeth Dechrau'n Deg?	Nac ydy
A yw'r gwasanaeth hwn yn hyrwyddo'r iaith Gymraeg a diwylliant Cymru?	Mae'r gwasanaeth hwn yn rhagweld, yn nodi ac yn diwallu anghenion Cymraeg a diwylliannol pobl sy'n defnyddio'r gwasanaeth, neu a all ei ddefnyddio.

<u>Llesiant</u>	Da
<u>Gofal a Datblygiad</u>	Da
<u>Yr Amgylchedd</u>	Da
<u>Arweinyddiaeth a Rheolaeth</u>	Da

I gael rhagor o wybodaeth am raddau, gweler diwedd yr adroddiad hwn

Crynodeb

Mae'r plant yn hapus ac wedi setlo ac yn mynegi eu hunain yn dda. Maent yn cael cyfleoedd da i wneud dewisiadau am bethau sy'n effeithio arnynt. Mae'r plant yn rhyngweithio'n gadarnhaol â'u ffrindiau a gyda'r rheini sy'n gofalu amdanynt. Maent yn brysur ac yn weithredol frwd ac yn dangos diddordeb yn eu chwarae a'u dysgu. Mae'r plant yn meithrin eu sgiliau annibyniaeth mewn ffordd briodol.

Mae'r staff yn broffesiynol, yn gymwys ac yn llawn cymhelliant. Maent yn deall sut i gadw'r plant yn ddiogel ac yn iach. Maent yn amyneddgar, yn garedig ac yn ofalgar tuag at ei gilydd a'r plant. Mae'r staff yn cefnogi dysgu a datblygiad y plant yn effeithiol drwy amrywiaeth o weithgareddau a chyfleoedd.

Mae'r bobl sy'n rhedeg y lleoliad yn sicrhau bod yr amgylchedd yn ddiogel ac mewn cyflwr da. Mae digon o le dan do ac yn yr awyr agored i'r plant chwarae ac ymlacio. Mae cyfarpar a dewis da o deganau a deunyddiau ar gael iddynt sy'n diwallu eu hanghenion chwarae yn dda.

Mae'r bobl sy'n rhedeg y lleoliad yn ymrwymedig i sicrhau bod y gwasanaeth yn cael ei reoli'n effeithiol. Maent yn rhannu eu gweledigaeth ar gyfer y gwasanaeth â'r staff, gan eu helpu i ddilyn polisiau a gweithdrefnau yn effeithiol. Mae'r bobl sy'n rhedeg y lleoliad yn anelu i ddarparu gwasanaeth o ansawdd dda i'r plant a'u teuluoedd.

Mae'r plant yn hapus ac wedi setlo yn y lleoliad. Maent yn hyderus yn gwneud penderfyniadau am sut i dreulio eu hamser. Er enghraifft, maent yn symud yn rhydd o amgylch y gweithgareddau ac yn dilyn eu diddordebau. Mae'r plant yn awyddus ac yn hyderus i rannu eu syniadau, ateb cwestiynau a siarad â'r staff, gan wybod y byddent yn gwerthfawrogi'r hyn sydd ganddynt i'w ddweud. Er enghraifft, yn ystod amser cylch, caiff y plant gyfle i rannu sut maent yn teimlo, a sut mae eu diwrnod wedi bod. Maent hefyd yn pleidleisio dros ba gêm yr hoffent ei chwarae cyn amser byrbryd.

Mae'r plant yn teimlo'n ddiogel gan eu bod yn cael gofal gan aelodau o staff y maent wedi meithrin cydberthnasau cynnes â nhw. Maent yn teimlo'n gyfforddus yn gofyn i'r staff am gysur iddynt pan fydd angen. Mae'r plant yn hyderus wrth siarad ag oedolion eraill sy'n ymweld â'r lleoliad am eu bod yn teimlo'n ddiogel. Maent yn gwneud ffrindiau ac yn sgwrsio â'i gilydd yn ystod amser byrbryd ac amser chwarae, gan wenu a chwerthin yn aml.

Mae'r plant yn gyfeillgar ac yn rhyngweithio'n gadarnhaol â'r staff a gyda'i gilydd. Maent yn rhannu tegau, yn cymryd eu tro, ac yn cydweithio'n dda i gwblhau tasgau. Er enghraifft, wrth chwarae yn yr iard chwarae antur, maent yn cymryd eu tro i ddringo, cydbwysu a siglo ar y gwrthrychau gwahanol er mwyn cyrraedd yr ochr arall. Mae'r plant yn dilyn rheolau'r lleoliad, yn ymddwyn yn dda ac yn dechrau deall anghenion eraill. Er enghraifft, mae system gyfeillio ar waith, lle mae plentyn hŷn sy'n fwy hyderus yn cael ei baru â phlentyn iau i annog cyfeillgarwch, ac ymdeimlad o berthyn yn y clwb.

Caiff y plant ddigon ddewis o weithgareddau ac maent yn mwynhau eu chwarae a'u dysgu. Maent yn mwynhau'r adnoddau y maent wedi'u dewis ac yn chwarae ar eu pen eu hunain neu gyda'r plant eraill. Er enghraifft, gwelsom grŵp o blant yn mwynhau arbrofi â'r adnoddau naturiol yn yr awyr agored. Roeddent yn palu twll gyda ffyn er mwyn creu pot coginio, ac yn mynd am dro i gasglu gwair, brigau a dail i greu prydu gwahanol. Creodd grŵp o blant hunanbortreadau â chlai. Roeddent yn canolbwyntio'n dda, gan greu siapiau ac arbrofi â'r lliwiau gwahanol.

Mae annibyniaeth y plant yn datblygu'n dda. Cânt eu hannog a'u cefnogi i wneud pethau drostynt eu hunain, ac maent yn cael cyfleoedd i ddatblygu eu sgiliau ac i fod yn annibynnol. Er enghraifft, maent yn helpu eu hunain i fwyd yn ystod amser byrbryd, drwy bigo ffrwythau â gefail, ac maent yn defnyddio'r ffynnon ddŵr i helpu eu hunain i ddŵr. Mae'r plant yn arwain ac yn cyfarwyddo eu chwarae ac yn dewis adnoddau fel y dymunant.

Mae'r staff yn hyderus o ran eu dyletswyddau i ddiogelu plant ac wedi cael hyfforddiant diogelu. Maent yn hyderus o ran y camau cywir i'w dilyn pe bai ganddynt bryder yn ymwneud â lles plentyn. Mae'r staff yn sicrhau bod y plant yn gwybod sut i adael yr adeilad yn gyflym ac yn ddiogel pe bai angen gwneud hynny, drwy gynnal ymarferion tân rheolaidd. Mae'r ymarferion hyn wedi'u dogfennu'n dda mewn cofnodion penodol. Mae gan y staff dystysgrifau cymorth cyntaf pediatrig cyfredol a chaiff unrhyw ddamweiniau sy'n digwydd eu cofnodi'n effeithiol a'r wybodaeth ei rhannu â'r rhieni.

Mae'r staff yn annog ffyrdd iach o fyw drwy ddarparu digon o gyfleoedd i'r plant wneud ymarfer corff a sicrhau eu bod yn treulio amser allan yn yr awyr iach. Caiff hylendid da ei hyrwyddo, gyda'r staff yn annog ac yn cefnogi pob plentyn i olchi ei ddwylo yn ôl yr angen. Mae amrywiaeth eang o fyrbrydau iach ar gael i'r plant. Mae systemau effeithlon ar waith i roi gwybod i staff o ofynion deietegol unigol y plant er mwyn iddynt allu sicrhau bod y plant yn cael byrbrydau addas.

Mae'r staff wedi meithrin cydberthnasau cadarnhaol â'r plant. Maent yn siarad â nhw mewn ffordd garedig ac yn eu trin â gofal a pharch. Mae'r staff yn defnyddio strategaethau effeithiol a chyson i hyrwyddo ymddygiad cadarnhaol yn unol â pholisi'r lleoliad. Er enghraifft, maent yn tynnu sylw'r plant gyda gweithgaredd arall os byddant yn ei chael hi'n anodd rhannu, ac yn rhoi esboniad clir pan na fydd eu hymddygiad yn dderbyniol. Maent yn gosod ffiniau realistig, gan ystyried dealltwriaeth y plant a'u cam datblygu. Mae'r staff yn defnyddio canmoliaeth yn aml i annog y plant i ryngweithio ac ymddwyn yn gadarnhaol. Maent yn modelu sgiliau cymdeithasol yn effeithiol wrth chwarae ochr yn ochr â'r plant.

Mae'r staff yn darparu amrywiaeth o weithgareddau llawn hwyl y maent yn gwybod y bydd y plant yn eu mwynhau, gan gynnwys cymysgedd da o weithgareddau dan do ac yn yr awyr agored. Maent yn adnabod y plant yn dda ac yn gyfarwydd â'u hoff bethau a'u cas bethau. Mae'r staff yn casglu gwybodaeth gynhwysfawr am anghenion gofal, personol a meddygol unigol y plant cyn iddynt ddechrau yn y lleoliad, gan eu helpu i gynllunio'n effeithiol i ddiwallu anghenion unigol. Mae gan y staff systemau effeithiol ar waith i gyfathrebu â'r rhieni, gan eu hysbysu'n rheolaidd am amser eu plentyn yn y lleoliad.

Mae'r bobl sy'n rhedeg y lleoliad yn darparu amgylchedd diogel. Er enghraifft, caiff mynedfa'r lleoliad ei reoli. Caiff y drysau allanol eu cadw dan glo a gofynnir i ymwelwyr lofnodi'r llyfr ymwelwyr wrth gyrraedd. Mae'r staff yn cadw cofrestr gywir o bresenoldeb y plant, ond nid ydynt yn cynnwys amseroedd cyrraedd a gadael y plant ar y gofrestr ddyddiol. Mae gan y bobl sy'n rhedeg y lleoliad asesiadau risg ysgrifenedig ar waith, sy'n amlinellu peryglon posibl i ddiogelwch y plant a'r camau a gymerwyd i reoli neu ddileu'r peryglon hyn.

Mae'r bobl sy'n rhedeg y lleoliad yn darparu ardaloedd mawr i'r plant chwarae a dysgu. Maent yn sicrhau bod y lleoliad yn cael ei ddefnyddio'n effeithiol i annog datblygiad, dychymyg a chwilfrydedd y plant. Mae'r bobl sy'n rhedeg y lleoliad yn sicrhau bod pob ardal a ddefnyddir yn cynnwys digon o le ac yn groesawgar i'r plant. Caiff tegantau ac adnoddau eu storio ar lefel isel er mwyn i'r plant allu cael gafael arnynt yn hawdd. Mae ganddynt doiledau gyda chyfleusterau addas a sincipiau isel i hyrwyddo annibyniaeth y plant. Mae'r iard chwarae yn cynnig cyfleoedd i'r plant ddatblygu eu sgiliau corfforol drwy ddefnyddio cyfarpar dringo neu ddewis o'r detholiad o deganau awyr agored. Mae'r ardal laswelltog, fawr yn cynnig cyfleoedd i'r plant chwarae a rhedeg.

Mae'r bobl sy'n rhedeg y lleoliad yn darparu amrywiaeth dda o deganau ac adnoddau sydd mewn cyflwr da ac sy'n briodol ar gyfer oedrannau a champau datblygu'r plant. Er enghraifft, drwy chwarae â theganau adeiladu, gweithgareddau crefft, a gweithgareddau chwarae rôl. Mae'r adnoddau yn yr ardal allanol o ansawdd da ac yn hyrwyddo chwilfrydedd y plant a'u hawydd i archwilio. Mae'r bobl sy'n rhedeg y lleoliad hefyd yn sicrhau bod digon o gyfleoedd i'r plant archwilio deunyddiau naturiol, deunyddiau cynaliadwy a deunyddiau wedi'u hailgylchu.

Mae'r bobl sy'n rhedeg y lleoliad yn rhannu gweledigaeth glir â'r staff ac mae ganddynt amrywiaeth dda o bolisiau a gweithdrefnau ar waith, sy'n cyfrannu'n effeithiol at redeg y lleoliad yn hwylus. Maent yn adolygu'r polisiau hyn yn rheolaidd, gan sicrhau eu bod yn gyfredol a'u bod yn cynnwys yr holl wybodaeth angenrheidiol. Mae'r bobl sy'n rhedeg y lleoliad yn sicrhau bod y datganiad o ddiben yn rhoi disgrifiad clir a chywir o'r hyn y gall y gwasanaeth gynnig; Mae hyn yn golygu y gall rhieni wneud penderfyniad gwybodus o ran a yw'r lleoliad yn diwallu anghenion eu plentyn.

Mae gan y bobl sy'n rhedeg y lleoliad drefniadau cadarn i nodi cryfderau a meysydd i'w gwella. Maent yn gofyn am adborth rheolaidd gan y rhieni, y plant a'r staff. Caiff y wybodaeth hon ei defnyddio i lunio adroddiad blynyddol ar ansawdd y gofal sy'n amlinellu cryfderau'r lleoliad a meysydd i'w datblygu. Mae'r adroddiad yn cynnwys adborth cadarnhaol iawn gan y rhieni sy'n dangos lefel uchel o foddhad â'r gwasanaeth a ddarperir.

Mae'r bobl sy'n rhedeg y lleoliad yn sicrhau bod y staff yn cael hyfforddiant rheolaidd ac maent yn eu cefnogi er mwyn iddynt allu cyflawni eu rolau'n effeithiol. Maent yn sicrhau bod y cymarebau staffio gofynnol yn cael eu bodloni bob dydd. Dywedodd staff wrthym eu bod yn teimlo eu bod yn cael eu cefnogi gan y bobl sy'n rhedeg y lleoliad a'u bod yn teimlo'n gyfforddus i fynd atynt gyda chwestiynau neu i drafod unrhyw broblemau. Mae'r bobl sy'n rhedeg y lleoliad yn sicrhau bod ffeiliau addasrwydd y staff yn gynhwysfawr ac yn cynnwys y wybodaeth angenrheidiol, gan ddangos bod gweithdrefnau recriwtio diogel ar waith. Caiff y staff eu goruchwyllo, ond ni chaiff arfarniadau blynyddol yn cael eu cynnal yn rheolaidd.

Mae gan y bobl sy'n rhedeg y lleoliad gydberthnasau da â'r rhieni. Mae'r staff yn siarad â rhieni a gwarchodwyr ar ddiwedd y sesiynau fel bod gwybodaeth am ddiwrnod y plant yn cael ei rannu. Mae'r bobl sy'n rhedeg y lleoliad hefyd yn defnyddio tudalen breifat ar y cyfryngau cymdeithasol lle y gallant rannu lluniau a gwybodaeth â rhieni. Mae'r rhieni yn canmol y gofal a roddir i'w plant. Mae gan y bobl sy'n rhedeg y lleoliad gydberthynas agos iawn â'r ysgol. Er enghraifft, maent yn gweithio'n dda gyda'i gilydd ac yn rhannu adnoddau, cyfleusterau a'r amgylchedd er budd y plant.

Crynodeb o'r Achos o Ddiffyg Cydymffurfio

Statws	Ystyr pob un
Newydd	Nodwyd yr achos hwn o ddiffyg cydymffurfio yn yr arolygiad hwn.
Adolygwyd	Adolygwyd cydymffurfiaeth yn ystod yr arolygiad hwn ond ni lwyddwyd i'w chyflawni. Mae'r dyddiad targed ar gyfer cydymffurfio yn y dyfodol a chaiff ei brofi yn ystod yr arolygiad nesaf.
Heb Gyflawni	Profwyd cydymffurfiaeth yn ystod yr arolygiad hwn ond ni lwyddwyd i'w chyflawni.
Cyflawnwyd	Profwyd cydymffurfiaeth yn ystod yr arolygiad hwn a llwyddwyd i'w chyflawni.

Rydym yn ymateb i achosion o ddiffyg cydymffurfio â rheoliadau pan gaiff canlyniadau gwael i bobl, a/neu risg i lesiant pobl eu nodi drwy gyhoeddi Hysbysiad(au) Gweithredu â Blaenoriaeth.

Rhaid i'r darparwr gymryd camau ar unwaith i ymdrin â hyn a gwneud gwelliannau. Os bydd darparwyr yn methu â chymryd camau gweithredu â blaenoriaeth erbyn y dyddiad targed, gallwn uwchgyfeirio'r mater at Banel Gwella a Gorfodi.

Hysbysiad(au) Gweithredu â Blaenoriaeth

Rheoliad	Crynodeb	Statws
Dd/G	Ni nodwyd unrhyw achosion o ddiffyg cydymffurfio o'r math hwn yn yr arolygiad hwn	Dd/G

Lle byddwn yn canfod achosion o ddiffyg cydymffurfio â rheoliadau ond na chaiff unrhyw risg uniongyrchol na sylweddol i'r bobl sy'n defnyddio'r gwasanaeth ei nodi, byddwn yn tynnu sylw atynt fel Meysydd i'w Gwella.

Rydym yn disgwyl i'r darparwr gymryd camau i unioni hyn, a byddwn yn ystyried y mater hwn eto yn ystod yr arolygiad nesaf.

Maes i'w Wella/Meysydd i'w Gwella		
Rheoliad	Crynodeb	Statws
Dd/G	Ni nodwyd unrhyw achosion o ddiffyg cydymffurfio o'r math hwn yn yr arolygiad hwn	Dd/G
	Rheoliad 15 – mae angen i'r darparwr gynnwys yr ardaloedd a ddefnyddir yn y Datganiad o Ddiben a mwy o wybodaeth am gyfleusterau. Nodyn – gofynnwyd i'r darparwr edrych drwy'r Datganiad o Ddiben hefyd a gwneud yn siŵr ei fod yn adlewyrchu unrhyw bolisïau a gweithdrefnau newydd cyn cyflwyno cais newydd i gynyddu nifer y plant sy'n cael gofal i'r Tîm Rheoleiddio.	Cyflawnwyd

Lle byddwn yn canfod nad yw'r darparwr yn cyrraedd y Safonau Gofynnol Cenedlaethol ar gyfer Gofal Plant Rheoleiddiedig ond nad oes unrhyw risg uniongyrchol na sylweddol i'r bobl sy'n defnyddio'r gwasanaeth, rydym yn tynnu sylw at yr enghreifftiau hyn fel Argymhellion i Gyrraedd y Safonau Gofynnol Cenedlaethol.

Rydym yn disgwyl i'r darparwr weithredu i ymdrin â'r rhain, a byddwn yn eu hystyried yn yr arolygiad nesaf.

Safonau Gofynnol Cenedlaethol	
Safon	Argymhelliad/argymhellion
	Ni nodwyd unrhyw argymhellion mewn perthynas â'r Safonau Gofynnol Cenedlaethol yn ystod yr arolygiad hwn

Pan fyddwn o'r farn y byddai hynny'n ddefnyddiol, mae'n bosibl y byddwn yn gwneud argymhellion arferion gorau. Nod yr argymhellion hyn yw annog lleoliadau sy'n gwneud yn dda i ddod hyd yn oed yn well wrth helpu plant i ffynnu.

Arferion Gorau	
Argymhelliad/argymhellion	
Sicrhau bod y staff yn cael arfarniadau rheolaidd ac ystyrion.	
Cofnodi amseroedd cyrraedd a gadael y plant ar y cofrestrau dyddiol.	

Graddau	Ystyr y graddau
Rhagorol	Gwasanaethau sy'n ymrwymedig i welliant parhaus ac sydd â llawer o gryfderau, gan gynnwys enghreifftiau arwyddocaol o ymarfer ac arloesi sy'n arwain y sector. Mae'r gwasanaethau hyn yn darparu gofal a chymorth o ansawdd uchel a gallant ddangos eu bod yn gwneud cyfraniad cadarn tuag at wella llesiant plant.
Da	Gwasanaethau sydd â chryfderau a heb unrhyw feysydd pwysig sydd angen eu gwella'n sylweddol. Maent yn rhagori ar y gofynion sylfaenol yn gyson, gan sicrhau canlyniadau cadarnhaol i blant a hybu eu llesiant yn rhagweithiol.
Digonol	Gwasanaethau lle mae mwy o gryfderau na meysydd i'w gwella. Maent yn ddiogel ac yn bodloni'r gofynion sylfaenol ond mae angen gwelliannau er mwyn hyrwyddo llesiant a gwella canlyniadau i blant.
Gwael	Gwasanaethau lle mae mwy o feysydd pwysig i'w gwella na chryfderau ac mae enghreifftiau arwyddocaol o ddiffyg cydymffurfio sy'n effeithio'n negyddol ar lesiant plant. Lle bydd gwasanaethau yn wael, byddwn yn cymryd camau gorfodi ac yn cyhoeddi hysbysiad diffyg cydymffurfio.

A oedd yr adroddiad hwn yn ddefnyddiol?

Rydym am glywed eich barn a'ch profiadau o ddarllen ein hadroddiadau arolygu. Bydd hyn yn ein helpu i ddeall a yw ein hadroddiadau yn rhoi gwybodaeth glir a gwerthfawr i chi.

I rannu eich barn ar ein hadroddiadau, dilynwch y ddolen isod i gwblhau arolwg byr:

- [Arolwg adroddiadau arolygu](#)

Os hoffech roi adborth cyffredinol ar wasanaeth, ewch i'n [tudalen Arolygon adborth](#).

Dyddiad Cyhoeddi 18/11/2024